

四庫全書

集部

欽定四庫全書

集部

懷星堂集卷十五  
六

詳校官監察御史<sub>臣</sub>曹坦

中書<sub>臣</sub>劉源溥覆勘

總校官庶吉士<sub>臣</sub>何思鈞

校對官中書<sub>臣</sub>朱炘

謄錄貢生<sub>臣</sub>陳昌敬

欽定四庫全書

懷星堂集卷十五

明 祝允明 撰

傳志

先妣陳氏夫人墓誌

嘉靖三年歲甲申春先母陳夫人病蓐食至夏六月十  
一日甲辰酉時沒不肖孤允明以其年冬十一月三十  
日庚寅葬于橫山丹霞塢先塋之右謹用後世墓誌法  
例次第夫人生卒日辰內外宗屬并事行節概刻石葬

冢中不肖位微不及年格以徽封命于廷為夫人寵榮古謂母夫人故從之夫人陳氏吳縣人諱某考諱紳字用章自太學生為安福丞母王氏以正統己巳歲五月十日未時生夫人成化乙未先考喪先妣徐夫人先大父叅政府君為先君圖繼室時夫人已踰笄猶在室請而得己亥嬪于祝庚子生一女癸卯先君下世蓋夫人嬪時年已三十與先君同室纔四年從不肖勉事凡四十有一年而終先君不幸不及中壽不肖不能蚤仕高

位以豐祿久養於夫人夫人雖春秋七十有六而腴佚之日淺獨持貞德慈恩以下見先人嗚呼豈不痛哉先考諱某字某別號仁齋不肖允明仕惠州府興寧縣知縣終應天府通判女弟嫁史臣而寡孫男一人曰續今為臨江府同知孫女一嫁監生王穀禎曾孫女三夫人德性純懿操履詳順撫兒女卑幼咸極仁愛即小小臧獲未始輕詈一言撻一箠久約而不愠晚泰而不驕謚處閨閻終歲無所出入夷然安也自餘善行纖細不可

勝述亦以委伏荒割不敢繁為文辭少間謀請名筆表  
揭先人之藏或克牽聯書之不肖忍死以有俟也不肖  
孤允明泣血

東南人傳

東南有一人其世出甚華此人近五十而時不能定之  
蓋軼絕當時皆不能言之言其至不似驚衆人衆人因  
絕不識知之宜也知其皮毛而不知中藏知其皮毛已  
大譽推絕羣而未至初無知中藏知中藏固絕可驚然

不異端也讀書學為仕亦從世格舉不加力務亦弗矯  
而去之蹇然卑寒無尤止而光焉即此時令長三公丞  
一人竄然建平天下勲燦百代無顛折顏色聲氣固凝  
然無毛末易也以為王公皂隸者一神聖至賊逆乃萬  
萬耳自周孔竺乾軒老至百流伎無讓不克為者又始  
無顛工隨女問數隨出之皆詣冥極也自亦不識何方  
得之時與古人對語翕然斂至無一簞食無與于其中  
及臨財亦矻矻交于彼亦不作硜硜苦怪節為竦人視

聽類鄙貪夫然為人盡掩取去又無毛末惱以彼得  
逾驩虞寧粥譏翹侮不消詳勺量為兩曲全之也寶  
玉器面擲碎無一點異色大畧觀貨賄若營護之者與  
糞土一此誠天子者由更以賤貨病不可強從俗情視  
俗情皺眉蹇而去之然所履有甚於此者為事如倒北  
至甚若繆纓冕之而無榮撻詈之而莫辱刀斧之而何  
畏死生不問何有於他哉又若鈍強無廉稜其詣處實  
然貫日月洞鬼神與元極一而文章與運化流



或問東南之道東南曰大曰不大曰吾豈蛇又問曰實  
曰不實曰豈芻靈又問曰通曰不通曰豈土木偶歟東  
南之言若此然則其人固不易知其自語三道者其所  
以為人乎

九境畸傳

九境畸者合三才萬物為其身總花木繪染為其色通  
風水八音為其聲齊有無正變為其道同古今精粗為  
其事其大蓋若是夫人大曰聖禽大曰鳳水大曰海大

則畸故萬載數聖千秋一鳳六合四海故曰九境畸

系論

原闕

欽定四庫全書



陳星堂集

爵服府君乃遣公游業郡膠期武經術舉試未捷而府君薨矣公遂依親以居今皇帝踐阼弘施覃霈追卹遺舊諸先有命秩者仍入叙錄公於是載佩國章沐浴皇

治詠歌圖繪以寄其尚別署味雪居士申情自得踰浹  
旬紀以疾卒于弘治壬戌二月壬戌初生正統丙寅正  
月庚辰為年五十有七凡兩娶先陝西按察副使劉公  
瀚女蚤沒繼太常卿崑山夏公景女賢明履道勤家惠  
下稱內外之族偕老聯化相去適月其諱德賢字惠媛  
其生景泰壬申八月庚午卒亦壬戌正月丁亥年五十  
一子男三人美承夏出美朝美爵別出子婦都顧張三  
氏孫男二人同符同策孫女三人皆幼以卒歲十一月

甲申合祔邑西貞山祖塋之原允明為公外甥寔宜述  
事標墓播衆詒久嗟夫宇宙渺渺人綱人紀君欲臣良  
臣願主聖父志子孝子望父慈國有爵賞以勸家有身  
教以傳彼此諧值則國康家肥極建福錫厥為世典大  
矣然而氣數消息理無恒泰倚伏往復不膠于常惟夫  
明良孝慈天命凝發曠世弗隆何屈伸存亡之隔何日  
月陵谷之易敬用剏要列石託諸不刊為我徐氏子孫  
其永法守以無忘王澤先烈又廣為人綱之弘勸焉

顯妣武功伯夫人蔡氏祔葬誌

代母  
舅作

惟有明成化二十三年歲次丁未冬十二月庚寅不孝  
子世良謹奉先妣夫人之櫬葬于吳縣貞山之塋祔于  
顯考武功府君之兆禮也夫人姓蔡氏諱妙真宋端明  
殿學士謚忠惠襄之幾世孫今為宛平人夫人之父曰  
以道母曰朱氏夫人既筭歸于府君府君姓徐氏諱有  
貞字元玉爵至武功伯故夫人如其封夫人以永樂丁  
亥十二月六日生成化丙午九月朔終享年八十有子

男一即世良娶陝西按察司副使劉瀚女繼娶太常寺  
卿夏景女女五長嫁祝某次樂亭縣知縣蔣廷貴次朱  
琇次王璪次灤州知州潘齡皆顯宦家孫男三美承美  
朝美爵世良伏惟夫人慈孝貞順全婦人之德貴壽令  
終備夫人之福作配府君內外合懿雖傳記所稱何有  
加焉世良不肖速罰以至大故顛越荒亂未能昭發先  
德以章示久遠謹叙其族胤始終梗槩誌於壙中如此  
昊天罔極嗚呼痛哉



王府君妻祝氏碩人墓誌銘

碩人祝氏諱妙靖長洲王公諱成字彥剛之室贈朝請  
大夫贊治少尹山西等處承宣布政使司左叅議府君  
字煥文之長女而允明之祖姑也以洪武三十二年八  
月六日未時生成化二十<sup>缺</sup>年十二月二十二日戌時  
卒春秋八十有六子男一諱傑子婦江氏孫男欽孫婦  
沈氏孫女五秀端秀英秀貴秀芳圓秀壻沈楠呂洪  
呂韶陳蒙陸鉉曾孫男三復勝復吉復慶女一留貞皆

幼初傑謀以卒之明年葬碩人於楞伽山之丹霞塢未  
克事以其年十一月十八日病卒欽乃以又明年丁未  
十月十九日乙酉奉二柩葬焉嗚呼可悲也已允明往  
相之弔哭之餘相與追惟我祖姑之遺德以允明嘗事  
文字之業圖所以永其傳者允明謹雪涕述其槩曰祝  
故甲族由始祖元平江路總管碧山府君以來世以六  
藝相承至朝請府君及王恭人寔生我祖姑惟我祖姑  
鍾秀聚慶生有異質以孝事親以友處弟以貞相夫以

慈教子以儉勤理家以和抑接族姻以寬臨下於婦  
人之德蓋無不備者率所履所言皆從禮則一毫不  
苟肅如也資志穎敏高朗多才藝涉獵傳記甚富通書  
數善籌畫記藏眇竺經典富習深通蓋心一於善而已  
若組紉籩豆酒漿之工又精之姻黨女婦咸師效焉中  
年不幸以疾失明而賢能罔愆也允明嘗記我祖考參  
政府君之休致也祖姑寡居久矣府君與祖妣錢淑人  
時迎歸於我蒼顏皓首友恭周旋居然類唐李英公家

允明敬侍左右教言屢及又時為諸婦道古孝女貞婦  
慈母故事或述先德其言秩秩有古賢媛風範及府君  
之棄背祖姑猶存已卧疾牀蓐神思頗不寧允明數往  
問候則欣然引致牀側執手話言不哀允明因問碧山  
府君遺事為之甚喜鄭重道述無幾而不起矣嗚呼可  
哀也已惜哉允明愚劣無以章顯弘懿將謀之執紀述  
之筆者以為不若允明之真悉也遂不敢已銘曰

女則孝只婦維貞爾母亦慈矣生德罔愆死範久存賢

哉碩人有厚玄宮完璧永封無或壞崩哀哀孫子追遠  
如始于千百祀

明故南京太僕少卿李府君室恭人王氏墓誌  
銘

栢松陽之王出唐觀察使朗自閩來徙至宋以從龍功  
得官者十三人至高州助教利政生大理評事祖光二  
傳為元國子祭酒宗儒又三傳即景彰府君國朝以文  
學起家受知高皇帝初以舉人授教諭詔徵天下博學

士浙藩以聞留日直翰林陞知閬州御書名于策終翰  
林學士援經擢緯繪繡皇卷頡頏宋王為大明文苑宗  
家翰林生五子季貫終溧陽教諭是生恭人諱某天授  
懿淑家凝徽慶抱操靜一秉禮堅定平生言無譁猛服  
弗藻麗動罔專事門不數出晚益泯默寬然靖莊以迄  
于盡享年七十生於宣德己酉七月六日歿於弘治戊  
午四月望日初溧陽頻仕畿地而生恭人吳郡李氏游  
居南都世望肩埒故恭人歸于太僕府君貞伯父歷膺

命封同歸于蘇偕老繼化恭人出一男曰系為府學生  
卒二女嫁長洲祝允明武進張廷璵皆舉人嗣子一人  
曰紹出於側室年將及童問聘袁氏其未誕時府君以  
猶子似綜其家至是輔紹卜祔恭人于郡西橫山府君  
同穴以辛酉八月庚午窆嗚呼傷哉允明之喪府君也  
未達不能殫職分而慰遺志以為且妾有待今喪恭人  
猶然是用前後悲愧無已雖然幸有紹矣銘曰

焯焯王宗淵淵李世神作嘉耦人兼允懿四海之顧太

僕不顯恭人伉清塵其則不遠甥銘即幽以綴家史有  
弘焯于遐載右嗣子

徐府君妻孺人高氏祔葬誌銘

嗚呼儒人吾先妣之季母也吾自劍提比長時往拜甚  
依戀然且畏之蓋其仁有禮如此今亡矣允明方悲舅  
氏命記遺淑將琢石以棺同瘞敢不是奉謹書曰徐為  
吳望姓自孟聲府君國初以富戶徙畿赤有子三丈夫  
叔者武功府君吾外祖也季曰元瑾府君少長在京師



孟贛令之曰吾欲內爾婦須故鄉人吾故人高德進有  
淑女孺子圖焉府君承令內之即孺人也諱妙安時年  
才十七受母周教甚至既借來而姑已沒事舅極篤舅  
又沒乃與府君歸先里府君悉以廬舍與伯兄別就荒  
地縛茆葦稍障風露孺人手井臼者數年府君出商  
湘潭閩蜀輒經歲乃歸安其事若無家焉以孺人也既  
富矣孺人曰家自約入饒也則保之有道矣無若輯安  
先祠辟治塋兆立禱事為子孫恒守迺荐以教之爾府

君曰是會吾意至當悉從焉天順初武功公諡金齒蔡夫人暨舅姨留京師府君往迎還養之孺人調撫之力尤深踰五年天子特旨賜武功歸田萬里自天而下骨肉聚言夫人舅姨等交口謂頃都下忍禍離別行者留者投荒去旅卒卒各南北兩莫能計母息懌懌焉叔之迎護娣之矜煦何恩也武功曰吾悌弟淑婦素也至不以難遷則非今日竟沒沒吾失耳矣其若庾袞若王

之婦將無與遜焉蓋府君性極好施而孺人尤善

闕

闕

裨補俾勿怠事不獨此若贊府君應官格助軍受冠帶  
若養給宗黨及嫁娶貧獨藥疫棺暴至潛治官塗甬往  
往不受豐費又善讓惡譽雖患力在人養其辭孫心推  
若不及者子姓女婦咸化焉家俗持厚如古義門雖能  
散然無失當家奉無僭靡之具時語諸幼屬以立家時  
辛酸事或至灑涕曰若曹所受成孰非吾此中來今不  
復必以此望若曹唯確守不廢則亦莫吾媿矣比皆惕惕  
畏服孺人儀法莊整不作侯門靡風雖房院稠複臺婢

舩舩入其堂戶謚然若無人焉者與武功夫人既恩義相洽而夫人柔貞之德又越當世而彷彿古之聖媛晚暮娣姒相聚皓髻輝映案席府君卒孺人亦中風逾月屬續時弘治癸丑五月某日春秋八十二矣生乃永樂壬辰二月某日子男二曰世英世傑世傑蚤死女一歸揚黼孫男五曰美中美德美輝美恩美質美德府學生女四曾孫男五女八葬以乙卯十月某日冢在縣西北騎龍山珍珠塢祖兆內與府君祔舅命美德叙事以

來允明既詳纂且綴之銘詩其詩曰

坤陰含弘道成女女生蒸蒸雜鼠虎孺人粹矣抱淑賦  
篤性好修行有序曰婦而婦母而母弗為吝嗇為均予  
飾禮充義渙其聚邇族疏婣逮鄰伍助吉安凶濟涼窶  
澤出貞閨內斯普莪莪春秋倏遐舉德建慶集無遺枯  
騎龍之山珍珠塢巖巖左龍伏右虎土膏泉清氣膺膺  
青輝白彩藏珪琥羣昭羣穆欽爾祖封塋有樹廟有主  
時禴時烝警霜雨與澤偕延永亡斃

外祖迪功郎江西安福縣丞陳公誌銘

公陳氏諱紳字用章吳縣人考志善妣朱氏生公有良質弱冠從奚進士昌學舉業五試不利卒業太學入選授丞于安福安福江西大縣俗不尚同辭牘充斥通官顯人家滿鄉邑東連西引人人以第望自負吏政斷斷不易公舉其職岸然無回也餽輸尤難事公任之有餘力令去權縮邑篆亦優優焉任四歲而老民知思之君子以為得其心非得他民心類也平生和氣藹藹而不

流孝友忠信觴吟自娛春秋六十有六終於正寢明年  
冬月言歸玄宅允明公之外孫也哭奠之餘謹依公友  
人周君所書公事撮類為銘以刻之墓石公配王氏子  
男三人瑛環球女二人長即允明母先人曰祝氏璫次  
歸吳汝鎔孫男四人女三人公生以宣德元年正月十  
六日沒以弘治四年正月九日葬以五年十一月三日  
日曰庚申墓在薦福山銘曰

士也業成宦也志行老也居寧高朗令終子孫繩繩安

哉九京

登仕佐郎鴻臚寺序班湯府君墓誌銘

湯貫吳縣於今以大族稱最郡中不特以富而戢蓋他  
大族鮮以九族數千指聚食故多讓也獨未得其轉徙  
之悉今第知故為中原人從南宋遷江陰吳又江陰分  
條也始來者曰潤卿潤卿生均澤均澤生彥祥彥祥第  
二子曰宗本是生府君府君諱瑄字文瑞母周氏繼徐  
繼王府君小學之年則已知孝皇皇犇問求所以報親



者弗得或曰浮圖氏有茹素資福之說遂三年不鮮食  
弱冠大母有疾刲股藥之弗效傷慟作疾繼事三母先  
後一致終無衰減而養事宗本盡五致之孝尤稱能敬  
始在髫總已蓄大志自以為吾長也吾父母當驅吾入  
任用路矣既屬孤凶夙稟薄弱宗本閔惜以為不任弦  
誦勞也少逸之將俾壯而理男事府君殊不肯自逸密  
竊市典冊辦螢雪冬冬自厲弗休竟展轉羸憊以大病  
而學緒中斷焉年二十五始娶允明姑氏湯祝鄰密邇

百年彥祥奇姑氏聘之亦以病故至是始昏時先大父  
維清府君叅山西藩政府君數千里來逆女無何與姑  
氏同歸于蘇宗本方總家政御衆分職舉禮理財綱紀  
煩冗殆猶公府府君承令與羣從更翻行貨京師轉以  
饒益鄉之仕於朝者結合相與通懷達志會有旨善書  
者授秩署雜事府君曰時乎時乎即奉例入授鴻臚寺  
序班階登仕佐郎越三年勾當江南已而曰吾雅志簪  
組失其階塗今忽以韋素超侍禁宥專馳使牡吾復何

以塞吾君恩事竣遂不復起居久之病淋不愈改病肺  
外枯中乾榮衛竊消又加痰咳益劇或時迷昧失神猶  
自支厲一旦音語如常忽然而往矣弘治戊午四月甲  
午生以正統辛酉十二月丁酉年五十八遺男子二人  
長正倫為本縣儒學生娶顧氏今湖廣按察副使逢原  
女次健庶出聘鄭氏女子一人孫男女二人咸幼正倫  
卜是年十一月十一日奉葬于郡西靈巖鄉吳山之麓  
府君操性臯緩慎重不妄蓋孔子所稱以約失之者鮮

矣則府君其人也雖身不克志逸享未足然正倫秀朗  
顯勤才業克利大振府君不在茲乎惟先顯考終鮮兄  
弟悖友姑氏與府君猶夫兄弟也而允明辱愛尤深存  
亡之感實鍾厥心與正倫哀弔之餘拾綴遺美丹書玄  
石倚之外棺期重悠永又申之以詩焉其辭曰

人各有懷翔高潛深蜂蟻之義夙尚吾心孰司我彛繫  
此柅金綿綿髮膚先切淵臨大人有命我敢弗欽君陳  
張仲獨媿纓簪貢蠡之業道亦無侵同居千言不間於

人蘭茁其芽既過而湮西商作肅更特逢春習驟而喬  
蔚為宮林六藝之用殊進同倫寓稱大鴻楮聿斯任使  
命煌煌手捧而南還榮鄉郡允若買臣河潛伐輪我不  
素殮殆辱知機長卧故岑我馬玄黃西旭移陰尊有旨  
酒未暇盈斟褰裳去之回元太純江源悠悠可濟烝雲  
防而弗宣執承以奔粲粲文盾既道于岷沛物之勳  
匪遙伊今巖巖吳山中蘊瑤琨德人比之輝采宵騰錄  
錄小子增卹于忱鋪華垂烈慚此蕪湮永奠隧墟侑以

悽吟君蒿有融三難斯音

王烈母江氏壽穴銘

允明祖姑歸同邑王公公居閭門下塘業故殷公卒子  
宗善處士紹厥有家處士賦性豪偉有雄才濶量懿然  
鄉卓特人也於其家冠昏喪祭姻友慶弔伏臘迎饒問  
遺無失禮又熹周賑人多所給施凡若是皆倚辦於閭  
內日日舉其所為操施浩然頤指而集取諸困索猶原  
泉不知其所自來後又罹宗人之訟處士胥靡于官疏

牒胥伯譁擾歷歲支費益不勝計於時蓋主閭者為江  
孺人江孺人性氣畧如處士而材幹尤敏利故克有功  
時凡為族為姻若隣友於王而知江者無不交口曰賢也  
先王父叅政府君示姻曹曰婦任宜師江已而處士死  
一兒欽纒弱有室三女未行家稍束矣江孺人撫者嫁  
者無墮焉無幾老姑又亡欽又亡於是惟與嫠子婦摩  
鞠四嬰稚孫以居歷暑雨涉荒饑持門戶數年不少仰  
於人烈矣哉孺人之力歟孺人稟執聰明遇事機糾紛人

情竄伏一聞之立有裁擇判決億之屢中又意氣剛果  
既事無遁情而行以敏捷故罔弗濟又言論順直容度  
高潔黨分間不肯以一豪為人謾欺若挫抑之即或有  
是正辭折之無小不忍之態雖私親內屬倘有忒儀亦  
正之不能隱忍也又動履嚴重密姻之家不苟還往曰  
彼無以其富也而我易近之乎又多藝能孺人之賢衆  
矣其最大者事嫡瞽姑三十年又事生夫姑二十年皆  
備極子道無一髮缺一日怠其至且久如何其賢哉



予每接見敬奉不敢忽今年將如京師孺人命志其履  
系成章曰即子遠去吾當刻諸石他日寘吾藏穴使後  
子孫知我於王不敢負舅姑夫子之事如此者噫坤德  
之樞機有家何其濶歟為孝婦是為孝子良臣也為賢  
母是為明君賢父也是君臣父子二道偕也與其本為  
夫婦者而三馬則人綱灼灼乎在天地之間如其全人  
者當幾何哉當幾何哉若夫以嗣以續繫宗祊之重也  
而又治亂持危與蹇蹇匪躬託孤寄命而不奪者同科

則偉哉乎功德均隆而忠良並殫者歟敢僭進以稱曰  
王氏烈母舉功之不羣也以詔于來以慰奉其志烈母  
名某父曰景昭子男一人即欽娶婦卓氏復姓沈氏女  
五人孫男四人璿琇瑜珮烈母以宣德五年四月十一  
日生今弘治甲子歲七十五矣氣貌澄健不少衰所治  
壽藏祔先處士楞伽山之丹霞塢前岡也綴之以詩曰  
氣剛肅兮才明通既果敏兮又順雍將大施兮沛無壅  
始履達兮楮棟隆中懼擾兮鼠穿墉終投艱兮哀恤從

閱寒歲兮知彫松  
嗚厲兮卒無凶德  
備懿兮功特崇  
亦慈孝兮兼明忠  
人綱三兮萃一躬  
丕哉烈兮懸王宗  
樹沃劬兮食當豐  
睇桑榆兮延西春  
尚福祿兮來攸同  
爾繩繩兮養奉克  
世報德兮思元功  
美哉壤兮有壽宮  
後百歲兮雙劍封  
受介福兮王母降  
回源澤兮流亡窮

孺人王氏墓誌銘

孺人諱妙慶其生之族曰王所後之族曰祝所歸之族曰劉劉祝出長洲王出太原皆宦室也初正統時予先

王父太中府君以刑科給事中與國子祭酒少詹事劉文恭公同朝府君為長姑氏寯壻因得文恭之從子汝大館贅於家既而長姑卒府君視先考也少曰當圖輔之者壻故不可離也時太谷王妃父兵馬張英知之語府君曰吾中表之族有王君名郁者今任太原左衛千戶厥室何宜人誕二女其長者則嬪于晉邸為王元妃次在室也盍後於公而繼贅是圖府君曰善從之緘詞走伴以諏于劉之尊劉之尊曰可遂就醮焉景泰之甲

戊也明年生一男曰幹成化初府君致其政還吳孺人  
歸于劉已而居吾家為多後幹入京師圖仕進孺人往  
依之又數年幹被薦譯夷文于六館荐以受祿加服遂  
授鴻臚寺序班歲庚申汝大卒孺人與幹歸于劉越二  
年乃卒癸亥正月甲午也以宣德乙卯五月七日生享  
年六十九卜以某年三月甲申葬于虎丘合汝大之穴  
幹申奉治命邀余述銘予之孩提蓋嘗受孺人襁護之  
德其何能默孺人性甚婉良而才識警穎工巧越倫又

能安時與履通塞一致其賢洽於諸族姻間而終享壽  
康進加榮貴亦用慰於冥漠矣汝大以輸背冠帶孺人  
又嘗生一男天今榦弟二人妹一人皆側出也孫女二  
人銘曰

太原彭城居三族之華方舟泳游敦一德於家或柅之  
輓無往不復子也足母孰與不足續而恆兮茲謂終福  
安玄扁兮荐歆嗣祿

湯永之妻徐氏祔墓誌

徐氏子中表女兄也徐湯皆與祝為連湯有士曰水之  
徐有女曰德莊年相若也凡三族歲時嘉吉燕會間二  
氏輒相期結好而未果也既而各問名他姓輒參辰不  
協久之湯曰結好之願當不在茲乎一往求之即諧竟  
就禱盃徐氏既就湯家室攸宜信睦修篤而未幾湯君  
病不足蓐食淹久以死與徐氏相安蓋無幾何時徐氏  
當英歲握志確烈如山不搖沈寂閨寢又十五年乃染  
疾卒徐氏有至善貞順之範倍蓰他婦辯言巧笑一生

不聞於族侶其生天順戊寅四月乙酉歿弘治丁巳六月甲戌年僅四十耳父余舅氏字曰嗣華前武功伯猶子母王氏葬以己未八月乙卯穴在白馬澗南中麓山之原合祔永之徐氏不字始取永之兄子訓以嗣至是其舅以訓來稽顙曰新婦志行良無寧使銜恨九土而無如君知也予潛然書之銘詞曰

身未亡志亡幾時冷然以往也婉魄怡怡從靈修而駕元氣清霜白月兮無不同之幽幽遺壁掩山陞其年無



耆艾羣媪之師

史在野墓誌

在野為余女弟之夫氏史諱臣字在野吳縣人也以成  
化戊戌十二月七日生正德庚辰五月五日卒年纔四  
十三嘉靖癸未十一月二十四日庚寅葬花園村祖塋  
余當銘然而悲夫在野有志而無年又悲夫其孤衆室  
涼身後落寞又悲夫予妹之嫠苦也酸澌不能以筆  
然而俾其後得據依以知在野生死大概又假傳述以

少慰冥漠亦有在於此即言之初先考仁齋府君生妹  
四歲而下世妹稍長允明與母陳夫人謂不可誤其歸  
有問者多不當意史氏自處士浩生今隨州守引之甫  
室張夫人生在野為冢嗣乃以妹為在野求聘遂從而  
歸之無何隨州往任在野守廟墓於家在野有志脩飭  
自愛不肯落人後勤營業居闕闕弗溺靡俗不及為仕  
顯然好學尚文嘗一往省于隨歸不數年遂没有三子  
曰貢曰賢曰贊子婦曰顧曰顧曰張一女嫁張希載悲

夫銘之曰

行不失貞志在廓而成孰美其生靳靳中菑莞莞諸子  
孰厄其死與短而臧與抑寧憲而長與是並非人之願  
而理之常在野何否而惟一于此尚其餘淑之可藉抑  
冥相之可假俾後弗隊以下殆庶乎校亡靈而慰存者  
悲夫在野

賀先生誄

維弘治三年太歲庚戌十二月十一日戊午吳儒賀先

生甫卒于閭門外之里第明年葬于黃山嗚呼哀哉乃作誄曰

邈矣慶宗始顯惟輔是佐帝乙効庸肇祜晉鄭齊克陳  
寅與虎軍戎趙舍俎亘漢普衍繁東都純更以賀分抵  
散條代弗穢譜沿晉洵唐指弗遑數恂恂夫子有耀爾  
祖事我高皇績在大理爰及顯考墾茲儒田無妄之災  
孰厄而顛夫子承緒出死履安僑寄江陰棲泊立樊顯  
志厲業不病其身幹蠶克家忘其先艱春誦夏絃筆墨

簡編菑畝南疇桑麻東阡吞酸茹寒終日乾乾以壯以  
強食力累年修文起貨允若計然屢遷師帳再造故廩  
高閣連衢書齋數間小山幽亭竒花清泉遠集嘉賓巨  
登盤旋富吟宮商侑宣管絃神和氣融遐齒益健衆子  
養色羣孫捧膝士服儒言庭宇翼翼有魁鄉策有廩黌  
籍文源浚流滂渙沈溢夫子之志以莫不適嗟嗟夫子  
不思不羣剛勿戕中和非徇人屏斷僧巫不詔非神克  
勤克儉富弗濫貧少靡玩歲老尤持循木雷其根條柯

自蕃還庇本趾亦理之然報施既豐忽奪于天淹歲之  
昔終不可延嗚呼哀哉緜帙收芬遺草夜烟塵滕主楹  
音絕徽軫識旌飛翻黃山之領草露滋泠松溪夙暝頎  
頎玉躬漠漠沈影嗚呼哀哉小子王母連姻外支復有  
大父為夫子師誼敦歷世義禮匪虧小子之幸撰杖屨  
隨豈不感知與言悵悵包荒發蒙有銜不遺欲酬之後  
雖遂焉追嗚呼哀哉孰不有厄終泰厥否孰不有死死  
不愧士隱節完躬顯發在嗣鄉郡閭寂澌盡君子登文

旒旗淚涕曷止嗚呼哀哉

仙華先生誄

仙華先生者長洲趙公與哲甫也其諱同魯先自浦江  
仙華山來故號仙華生公以王孫遺貴而沈盜儒術振  
望林表垂數十年門第欽重是稱先生今則已矣多為  
辭詩以薦傷惜太原祝允明奉作誄曰

有宋周叔倜倜恭肅襲侯南陽隨國居睦其孫監稅宦  
居浦江良仁再徙斯吳金莊金莊六葉茲惟先生偉表

山峙吐音鍾鳴成器知道力學稽古上師聖賢近武叔  
祖叔祖維何曰友同彥如祇事太宗為時碩儒公有其  
才擁而不試有莘躬耕曾不忘世時事得失生人利病  
知無不言大夫問政歲則大饑官無善圖公策四出萬  
言為書挾走千里陳于撫臣彼搯其謨而譽其文公曰  
咈哉余豈銜玉為民請命抗論反復卒用一二布以郵  
之薦于司舉而亦尼之湖淫病田矢謀于公築之複之  
坊與水庸彼則何知始怨卒服公置其功而任其讞清



籍之苛驅民入伍公則往愬曷逢彼怒終則以悟乃更  
厥武或執荏苒導俾誣善乃用賈賄公曰其敢我則隨  
往不直不返乃悚而釋善類斯倖條約于族以義篤親  
聚貲公藏散給用均老養少教喪祭冠昏成美疾惡憂  
樂同人扶爾之顛匪望報為折汝之暴吾豈畏斯平以  
為執剛以為施通拘立懦時寓風諧先生之學鉅細博  
綜天緯地形醫方仙洞篇翰葩富談辯海湧云胡遐往  
內外傷痛嗚呼哀哉氣鈞生人終始有期踰耄之齒公

豈憾遺鄉門之戚失怙斷規嗚呼哀哉典刑曷寄咨爾  
室徒尚列名謚

懷星堂集卷十五

欽定四庫全書

懷星堂集卷十六

明 祝允明 撰

傳志

元故成全郎江浙官醫提舉恒齋葛先生墓表  
士抱賦穎粹砥行修業綜古聖人經術固將以自效達  
志用時兼濟上下流華於方來也或世代戾契既不我  
用於是在闕面林臯吾志已矣然而澤物之仁函乎  
中活世之方寓乎手緬觀斯人有病心惻乃有知者舉

而試之雖地隘施小吾且應之亦有以發志成效不孤  
天稟為聲永身後則獨非君子之心哉是亦君子之道  
也宋籙瀕訖竒傑之士散落草莽者何限吾鄉尤衆其  
稍出効用於勝國雖百售一二固稱於時以馳於後不  
可誣也若葛提舉先生其最也先生業行與其蹈履有  
黃文獻公晉卿志墓之文其裔孫懌比治飭遺冢以文  
在幽不得外暴雖人多憇傳錄故不普因斲穹石揭其  
前特請余屬詞刻其上因撮黃志大略為之叙云先生

諱應雷字震甫別號恒齋世平江人大父曰宣義郎恩  
恭父曰進義校尉從豫先生始受周禮於季父某為舉  
業業成而宋亡無所用之進義故儒者而學多能通九  
流百家醫尤工先生既無意干祿儒業之外遂專治父  
所遺醫法黃帝樞素諸篇搜抉研核無餘力自得甚深  
以為當世所謂醫者株守近代意見論病執方如檢畫  
一絕不識原委誠異古法乃推運氣之標本察陰陽升  
降之左右以定藏府虛實而合諸經絡氣血之流注於

是疾病之候死生之期無能逃焉從而立方法為之湯液砭焮自不能雷同他人竒效乃著聲華日騰焉時浙西提刑按察司判官中州李某推賢名嘗治其父疾亦致先生決之先生為之語云云李父子驚相顧謂南方乃亦有斯人乎因盡發藏書河間潔古諸說相共討尋凡先生之語無弗諧合去益以其道行南方之醫始能言劉張法者先生啟之也先生嘗謂守真若子和當女真強盛時人氣勁悍故宜多用宣泄逮其兵饑衰殘之

餘民瘁氣困於是潔古與李明之輩乃加以補益此其  
下工也宋既抄末醫多襲目見務守護不能為攻伐是  
謂養病非治病此由不知醫當視時執盛衰不知通變  
者也故所著書曰醫學會同凡二十卷大旨類如此於  
時近遠病家乞治無曠日幣馬塞門大夫士內交益衆  
皆敬禮推譽大德十年遂被薦授平江路醫學教授先  
生亦不辭為之治田疇嚴廟祀教育其徒往往去為善  
醫無幾省臺交舉擢江浙等處官醫副提舉進提舉階

自醫愈郎至成全郎延祐之某年也至治二年以內艱  
歸執喪過毀竟不久卒于家三年正月十八日也享年  
六十其子乾孫以泰定元年春二月二十八日葬之于  
吳縣至德鄉望墅墩先域之次乾孫字可久其學得諸  
先生而發之益竒取績轉神異世傳不衰吳中視為文  
獻家自先生缺世乃至懌

系之曰士惟無所可見見之或無本抑淺局故其所及  
名實廣狹以之有如先生劇心羣經且將用周公之典



以輔斯世既不果退用其餘以被物亦取十全功蓋亦得上古聖人之秘其震於時而引於後何有也黃公謂先生既棄去時業更以詩授乾孫又云先生質和粹識量明達外嚴內寬孝友篤于家而惠賑澤在閭里然則先生誠德人偉丈夫文獻重吾邦邦人世當重之豈獨其子孫恭慎乎丘樹而已也

葛先生墓補志

修行立節人之彥慶餘澤引慈之契敬宗傳美孝之鉅

發德實錄辭之善自夫伯翳倅封葛屬肇氏拔分五爵  
散部四民蕭規曹隨傍流達兼之澤伊耕姜漁鞏用舍  
藏之具君子不斬文獻能徵千載之間爛然充觀若夫  
唐靈斯薄周民或遺時則道明府君違淮南而之一邦  
卜澄江以宮一畝爾來不億尤引無極大概宋富顯公  
元多逸夫勝國告終之末真人出庶之先則茲野樵  
先生昉宗於吾蘇焉蓋歲駕丁酉江人恤戎先生從父  
益之而來洪武初紀遂綴版長洲而授廛城市先生諱侗

其字天民起居六藝飲食一經本窮義文枝獵王鄭研  
幾陰陽之緼觀象剛柔之蹟至於融陶性情比排宮商  
近嚴聲病之度遠守經緯之旨隨時言志夷然自獲辛  
未之歲應辟人材授雲南大理府同知力以病謝浩然  
東歸河干伐檀韞匱藏玉聞詩乃興志從劉王之招學  
易無過神符阮君之遜董惟尚下馬帳亦縣生徒執業  
遐邇烝集永樂戊戌凝然告終閱受春秋七十有八配  
室顧氏二子華倫始益之造居在本縣二十四都陳公

鄉之雉瀆及先生遷築考命遂即雉瀆之址為幽宅焉  
又越四世其孫曰弘時游大黌力述祖德更整系譜還  
輯遺吟復以石文無見玄美未傳固乞追纂所知章揭  
崇石庶幾終世有考來哲知欽源長祥餘墟空永安

明故文正書院主奉范公墓志銘

自文正書院立世遴一人統司之曰主奉魏公千載不  
斬之澤行諸其身責不輕矣然恒視其人為低昂由魏  
公長子監簿公嫡支而下十世曰廷榦嗣為之當洪武

初資業甲吳一邑邑舉總民稅稅多逋坐當除名詔執  
歸京師廷榦與室陳夫人訣曰吾罪即死應爾獨世澤  
斬於我吾何以入厚土何以面先公夫人曰即償之須  
幾何許曰二十萬曰計妾奩飾猶盈并益以君產當足  
償奚若以易覆宗之禍廷榦曰善立舉粥如民負輸之即  
就繫及京見上上釋其罪更加獎賜遣歸由是義田之寄  
長洲吳江族籍者坐廢而吳籍獨完存焉廷榦生天鑑  
穎秀抱遠畧有文行讓嗣職于他不居其人乃弗克負

荷至售手澤質公田義職以盡連族病之更合議還屬  
諸天鑑之子元理元理儒行惇潔博通經典有大度乃  
拮据黽勉裁節冗濫復手澤清義田別戶籍立提管一  
人專領之十載一易以革賃售之弊作砧稽簿四冊請  
于巡臣郡守印記之分畀主奉提管掌莊天平墳寺各  
傳守以備叅察失遺又修正家規圖乘損益給助白長  
吏列刻木榜縣示遠久更新忠烈廟若義莊若家廟主  
奉之任於是為大舉娶周氏是生公公諱從規字圖吉

賦性冲和操履中庸力思紹述親事克振先烈如新歲  
寒堂改塗書院易建石表凡祠事既董正周備又以文  
正忠宣而下累世宅兆在洛者久缺封掃請于官求自  
往省遂給過所以去至萬安山尹樊里省奠封掃如儀  
自魏公祔位諸冢遺封故存獨忠宣之兆越五里至則  
無所見問知為屯戍所平久矣因望祭悲號削墓蔓披  
砂礫肆菟不得乃禱于空踞泣連數日天忽大雨三日  
夜雨止滌土去深三尺餘露斷碣數尺題曰宋丞相范

忠宣公之墓公大驚喜亟白于守禦分閫官勅戍卒還  
公始案圖譜加封樹作墉屋辨止界正神道植望獸以  
表之勒石記事訖又為外舍屬褒賢寺僧居守又遣吳  
中支族一人往協相僧以居然後丘隴之職始與祠事  
並盡既復以今族食指百倍於舊而莊課不登乃合衆  
協謀取湯沐之樹易田百餘畝以附益之族祿始贍其  
意建樹多績效大帥如此始范家園故地殘圮公大新  
之鑿池立亭蒔花木育魚鳥中歲養息其間天平故有



卧雲書院公時往還自得因別號卧雲族人或盤繩范  
漁餽稟家憲當罰公惟舉憲風示而卒以厚度包容之  
不致罰或曰先生傷圓乎公曰吾家自咸通柱國府君  
以來積德百餘年而發於文正忠宣恭獻清憲諸烈祖  
奕世大顯至於今又六百餘年而不衰益熾子孫千億  
蹈儀循度不致散背者獨持一義字保之故爾人之格  
不齊惟義可以和之至如條法懲責先君特緣是垂教  
開人心耳吾所以兩調之如是將以不失先君意而默

有以永保義之心也聞者皆帖然其特見御務務為寬雅微遠又如此公生於宣德戊申九月乙卯卒於弘治丁巳三月甲寅享年七十配盛氏故太醫院御醫叔大之女誠一惠和有古賢媛風稱為世家主婦公初昏從外贅處盛氏尋共歸治婦母之道並無違以辛亥六月己亥生後公一載二月庚辰卒年六十七初不育常祿公弟太學生鳴吉少子汝舟將以為後既而貳室譚乃生子男二人長曰汝輿今補郡學弟子員嗣主奉次曰

汝駱女一孫男女各一汝輿等卜以明年戊午月日奉  
公與碩人合葬於雅宜山之新穴倩其族兄吳縣學生  
昌辰叙總遺行將著之不朽以允明與有姻分知仰切  
悉來以為委謹為撮書復綴作銘其詞云

君子之澤如水行地達之斯達壅則以滯苟達而滔奚  
遠無濟洋洋魏公仁源義委勤以卧雲載宣載止清廟  
既嚴穹丘亦治德豐行卓全歸善瘞拜瞻先公不憚九  
地江水泱泱沛於終世

薛先生墓志銘

吳有隱君子薛氏力學脩道七十而沒未嘗一日同時  
世浮詭者既沒孝嗣應祥謂允明與皇甫錄曰先處士  
多門人傳遠之託吾以委吾門人者要至先人之終而  
貴備也錄乃退為行狀甚詳允明相為參補謹誌之以  
薦于吾師曰先生諱英字時用貫長洲縣曾大父名遠  
大父弘道父繼周代傳六藝繼周娶于程生先生而家  
計不充然繼周不以家故遷守易業教先生轉嚴先生

亦轉刻厲學成而志不在顯赫養親之餘稍以膏馥惠  
後來劉僉事廷美沈二隱君貞吉啟南皆知之遞請尸  
塾席先生學則方肅授諸生悃悃端實居常時慎確寡  
語對人不能為佞詞和顏雅衣儀度沉厚御家不偏於  
侈陋拘肆自以貨殖聞達機智之間舉不巧於是自稱  
養拙子微飲諧歌熙然忘老初為邵大夫致鄉飲酒二  
十年後亦勸辭弘治甲寅年七十有四得疾十二月已  
未終于正寢將加殯猶命筆自書寄顏云云語意可慕

其生永樂辛丑七月癸未也配劉氏中書舍人孟功之  
孫祭酒文恭公之姪生子男二長即允明師寓迹縣學  
次曰得祥女三太學生王頤及劉侍范昌璧壻也孫男  
二曰金曰銓女三葬以丙辰正月甲申穴在金鶯鄉孟  
字圩之原銘曰

鼎鼎詩書翼翼冠裾吳何多儒匪儒之易厥或異趨將  
守之缺而施則餘肫肫先生實乃越譽高明考終安此  
幽墟煒煒我師踵弓以箕揚顯方來將頌命書有隕自

天匪志之需後者而過煩下其車茲唯公宜豈曰室徒  
故處士顏公墓銘

長洲處士顏公將老自為石椁以俟命既十三年乃卒  
又三年哀嗣復等乃奉以歸厝於是處士德行大致今  
吏部侍郎吳公嘗著列因椁以為銘復之將掩封更圖  
文方石內椁中為陵谷革易之慮邀其筆於允明允明  
少從先叅政接處士不能以辭文之傳遠者既具矣不  
必以濶惟其慮且不可以廢是為述族屬經閱一二兼

衍前文之實為繁辭以系馬庶幾以貽重來世曰處士  
諱昌字公懋甫曾祖天澤字潤之不受張士誠偽元帥  
府副使之命隱死于皇朝祖天泉字濟民父琇字季栗  
是為哭父死吳之達孝者也母李氏妻盛氏夏氏子男  
四人泰復升大有女一人孫男六人閔曾言孟冉宓女  
二人處士之生永樂丙申五月二十七日卒弘治庚戌  
十月七日年七十五葬癸丑十二月壬申墓在本縣金

鷺鄉古字圩銘曰



顏以孝聞振于昔今敷華胚渾有啟而承處士之稟弗  
渙其淳孩提而知知愛曰親親足傷爪我踣而呻哀哀  
失恃學樂之年充充猶猶以罔弗誠寔寔之事我力斯  
勤左篋右雷指敲搯龜祥忌烝祧祀事員員建本立儀  
既信而倫敏敏春秋通于亡存我憫我考烈孝亡羣我  
耀我考我力需人人孰諒只三年亡葦上下以動州司  
升聞孝理天下將徵勸恩孰為格之國典斯湮我身我  
心孰道以信口及我先我涕泫泫疇昔之夕既息我形

有赫我父下教其訛爾志我顯胡究我心爾祖遺休盍  
煥于文勿以贄脩而沮于貧有餽爾相爾伺于晨詰旦  
占之孰繇孰徵有容有容不速而臨有餽者器符夢之  
名迺上太史賁詞份份一氣之靈繫孝是根既立道本  
亦多旁仁歧伯之法我庸孔神或乞醫馬既施既平有  
病于旁孿孿女生一七下之亦底于寧宵闔我寢曰寔  
感君何以酬之君活之身我頽以迂孰是賈媯孰涅我  
緇孰磨我磷麾之不回我匪懷春我身曷生我感曷申

嗚呼噫嘻昧哉愚陰女則何知酬以潔清女乃適往化  
此魯男處士之容令氣氤氳座不苟同詞不粗陳鄉飲  
社聚方裾脩紳頓頓威儀亦孔莊溫孝子是呼下徹臺  
臣前以父作後以子因巍巍齊女孝子之門玄運莫留  
殲我孝君牆翬戒完即此靈辰生晦死葬千古之珍周  
棺有碣勒此鴻芬廣之邦閭永之子孫千秋萬年其無  
震傾陵壞谷移或換高深孰有見諸勿毀勿堊凡百君  
子念此孝墳

錢處士誄

高陽苗裔彭錢孫子厥名曰孚為周上士職典錢府因  
官命氏望于彭城世有彥美爰及李唐懿僖不綱九縣  
做擾鏐乃辟疆趙魏分茅桓文尊王比入宋室忠懿來  
歸顯列班序笏組陸離維此甄橋忠獻之枝公達昉遷  
維常亢之維常閱義格于英宗綸音表宅龍光盪空公  
生令稟仁冠義祗大川外達冰鏡內審詩書廣才智禮  
成性孝友大節信惠百行父有富業胼胝幹蠱父有殆

疾斷膚覬瘡豈不知禮因心切至暨其執喪戚易兼致  
兩弟短折死葬生給擇族繼絕厚嫁三息父妾弟妻守  
節孀娶豐養日奉衣糧歲支內外中表建諸屬眷彼  
其或匱吾此能瞻翼翼先祠累累世丘祭薦叅告謁掃  
封修綿聯譜牒熠燿文獻玉裁宋冊鐵鐫唐券先生謝  
表蘇公碑觀累代名鉅英辭妙翰石磨梨剌覆護流散  
三華家集名賢確論弁歸刊布籤帙充衍既圖紹述亦  
志兼善君子攸依小人復賴爾涉予梁爾暴予樞減額

而稅不息而貸年凶勸分發粟一再乃至三曾不少  
怠有司承制懋賞以秩始用郎級繼之右職公咸曰辭  
豈賈受直官不可回以歸燕翼比及其終堅卻猶昔官  
曰得之亦有故實重門載旌風聲逕籍有秩鄉飲幸公  
臨席流謙自牧華聞滂溢元公上卿交贊請識褒篇贊  
章璀璨縟繹公度既達公心孔安崇樓高齋滌沚芳園  
觴歌悅生翔植怡顏七十而卧脩脩大還嗚呼哀哉孰  
不有生生斯負之詭隨浮休鳥獸同期公則大完始終

弗虧今其止矣紹者伊誰嗚呼哀哉孰不有世世彼我  
此鄉原亂德揚朱為己公施溢分曷哇曷涖世則逋公  
今曷酬只嗚呼哀哉深山大澤實居龍蛇公歸九原胡  
邇胡遐止水不滓蕤璞非瑕清魂夜游上下無涯風霆  
共運星月同華公其快哉元氣為家嗚呼哀哉繫予二  
祖通好于公祝徐而錢鼎趾同風公不遺予包荒發蒙  
耆成後凋邦社漸空海宇之嗟曷以私恫最行文旗昭  
明有融淵淵德聲川壤齊終嗚呼哀哉

故詔旌義民錢公惟常遺像贊

陽秋中蘊制事之義而宅心之仁金玉外相秩乎其言  
而晬乎其面展也君子今不可見章服威儀千載毫練  
于何考德諸老紀傳吾萃以為其裔流之詔焉蓋曰玉  
音華袞事英廟之忠金券汗青紹武肅之孝五品孫而  
一家肥似古君陳隱從親而貞在俗類郭有道活凍餒  
也從范堯夫之棄舟折閣饗也非王孫賈之媚竈幽潛  
屢書存歿一道嗚呼鴻山巍巍中有大寶借此風神與



天不老

記吾鄉二老者

馬暈字公素嘉定人舉止迂固鄰夜火家具一不取惟頂巾躡履執大袍凝立通衢中行過深峻必舍舟車而徒回曲淹滯而不厭在舟展佛經香供跏趺唎誦振響人夾隄佇看不顧或稱以癡擊掌大笑遇鄙吝錢虜則以苛禮律之讀書專博鈔積甚富受妻家膏田悉以與人  
人有白菴集

沈誠字希明長洲人言必信行必果立不易方一介不取不予淹貫經籍而家無方策詩篇文筆一字不作居市間密鄰不識其面聞其聲登橙竊窺喜曰今日纔識沈先生也

金孟愚先生家傳

金孟愚先生者吳郡長洲人也其初自汴隨蹕南渡籍于此世有佳士而不為仕至父伯廣學行尤茂為里中子弟師時對門亦多儒士夏建中者尤名薦為儒學訓

導以女妻伯廣生孟愚既出詩禮家資賦又明穎文籍  
一誦讀不遺由是少弱已淹貫經史繼為里師律身謹  
而造士勤巋然自重與伯廣一轍性寡欲無俗好以介  
自命舉措每不徇同時衆其甚也人目以迂以矯而不  
辭蓋誠志乎狷者既鮮合所還往無幾人亦母友不如  
已云也如陳僉憲永錫杜先生用嘉邢隱君用理顧隱  
君寅仲其合志者也致孝祖先五祀而痛斥淫祠巫覡  
及老釋之教至野師陰陽宜忌最不信成化末郡守嘗

要與鄉飲酒然其視官政失得民俗美惡恒不能忘言尚書三原王公來巡撫孟愚謂其賢疏民務九端上之逮後御史巡按至亦以時弊往陳亦其志不自已也比老取素所讀書中集其闕人倫事理可法者為編曰羣書會萃所為詩文有草藏于家初別號近思後曰竹雪迂夫以自表其高潔絕世之意

贊曰邈之時義以遺世自善為是者必與斯人寡羣亦勢爾也然而有不盡絕世念孔氏亦與之耳吳最多隱

君子若杜公者，函中蹈靖，何其鳳德之盛，與其一於捐獨者，邢氏與故沈誠希明有名隱而專與世事者，趙同魯與哲顧亮亦然，而金孟愚乃畧同之，亦各從其志也。今杜趙之後，迺涉榮塗，邢顧沈皆無聞，金之子成性守素，慕文不令，家聲委地，輯述先事甚勤，又乞余特傳之，亦孝矣哉。

柳義士歸金贊

故御史柳公華居憂，嘗起復，嘉定陸坦與傾交，持白金

五十兩來贖公不受以貸則受乃受去公起巡閩中死  
鄧茂七之亂貸金事時獨公兒謙數歲侍傍他無一人  
知比謙從錮沒赦還陸已死久謙亦翁矣持子本侑醴  
食往歸陸之子陸子曰無之我固不知知獨父持金贖  
行客耳謙陳狀固予之往返三數陸始強受賢矣哉二  
義夫古罔斯艱於今走九土覓若一个不得也激為贊  
曰

二老去矣二子克承孝達事亡信歸平生二老僕僕偕

游地下亦讓亦悅含笑栩栩揮金見義雅不見金金亦  
炎炎義權不任維古斯易今力倍蓰完域寄孤反手於  
茲義如崇丘泰華終古嗇矣富人大盈鄙塢

徐處士碣

吳光福多才賢士新故接燿而徐族最徐之最如良夫  
樂餘克昭而來亦接燿而近時特以處士孟祥為魯靈  
光處士沒門人王復列遺美為傳嗣子鼎又自誌以畢  
未備至于今十有七年仲子頤乃更以碑章請於予曰

其有待也自先君之意則然矣於乎予不足以盡之按  
成傳舉前聞類著於不刊處士諱麟字孟祥其為人也  
體具陽秋而道孚華實少歲孤薄稚弟三人繼母戚之  
還就弟食處士如不可生亟往省視尋迎致事孝友終  
身推而敦族外而信友夔縣時情卓樹古義嘗失器疑  
在臧豎家人曰究之處士曰無問也嘗售貨賈從販夫  
家人曰縮之處士曰無技也鄰媪疫無家倚墻俟死處  
士舍而理之遂存川梁之杠缺病涉恐行處士葺復創



之乃濟至於儒謝小人學務為已綈紉飫乎腑腸組繡  
爛於指掌實之而粟布貴精之而糠粃去昏旦益觚槩  
倏忽就篇什上師必名賢下授多高第時哲達官承風  
欽躅然而山嶽靜肅曦暘動溫驪吟緩嚼百觥裁醉猶  
夷然無變度焉成化壬寅卧疾不祿甲辰秋日安厝於  
此鄧尉山之南麓其年七十又一前後系屬悉述先作  
嗟乎稱士衆矣難乎核實有如孝義植其本文華達其  
枝行治浮其聲者非士之真而宜傳易家以邦一邦以

金史卷之六十一  
卷十六  
天下一日以百千世私以公者與彼不尚德乃弗知傳  
此欲傳者必先求之求之無於他焉處士是也

### 韓公傳

韓公名襄字克贊長洲人也韓自武王庶子昉封及王  
室東遷失國而子孫遂氏之後更受采地于晉至景侯  
虔復受天王命列為諸侯迨秦而滅漢興王信復封傳  
四世國絕孽孫說以功封龍碓侯子增嗣增子寶無子  
國除寶弟騫遷南陽自騫十世為河東太守純其七世

孫播徙昌黎乃祖純而為昌黎之族播生後魏揚州別  
駕紹紹生北齊膠州刺史胄胄生後周商州刺史護護  
生隋邠州刺史賢賢生唐巫州刺史符符三子仲大智  
生休相玄宗休生澁相德宗當安史之亂迺自鹽山徙  
博野唐末徙贊皇五季徙安陽入宋惟穎川安陽二族  
為大安陽再世為魏忠獻王琦當時稱為相韓以別穎  
川族琦生駙馬都尉太師秦端節公嘉彥嘉彥生紹慶  
路節度使諮諮生保信軍節度使仰胄仰胄生浙西路

兵馬都監廖始居平江廖生浙西路兵馬步軍副總管  
性卿性卿生龍龍生榮甫始業醫榮甫生信仲信仲生  
斗一斗一生凝凝生奕夷當皇明永樂中夷與從兄奭  
並事太宗皇帝以醫太宗皇帝官奭為大醫院院使夷  
為院判寵賚優渥多越常典而奕尤以儒行表於山林  
間當時視其族如宋世之視朱張顧陸矣公為院判長  
孫蓋仲子布出也幼而孤後布之兄存其行首諸房孱  
苦成立獨精先業明允確廉不隨不同侃侃如也介介

如也老益恬淡無干于時而平生以其術澤人者則弗  
勝紀王氏婦體碩年老升樓蹶而仆諸醫都不終脈搖  
首言中風立死耳後至公公曰病是跌撲家授藥融導  
氣血氣血平常逾已而果然從兄之子之夫嚴恒病胸  
膈悶滯溺赤精滑作寒熱呂骨族間成核如胡桃比一  
枚特熱而痛不能言發在間日既三年公視之曰病自  
虛火之動為滋陰降火藥丸引以龍腦服一月熱止更  
為參耆補兩月病已病得之心切於生財而不定也所

以知者診其脈六部虛大時數數然也將歸姪女止之  
公言留無為特留一冬藥耳明年春應來蘇吾遠迎矣  
卒如之相城沈大隱君貞歲八十公去賀壽賀頃倏忽  
不寧便沈劇公脈之報無害飲以湯齊訖君就枕席公  
與容宿隱君猶子今隱君周舍丁夜聞內大哭聲容李  
者嗤先生誤邪公言事有非理所必吾終不見其死耳  
黎明問焉蓋哭以他故所以知者脈惟虛無他八十之  
人應然也今隱君室陳碩人病咽喉結丸小腫不痛不

瘡衆醫並以為痰癥也公謂隱君非痰癥一潰應死隱君戚其言姑從衆謀攻痰無幾丸決破越日便逝所以知者其脈弱其形衰其年及耆而不復榮滋部分在開闔也宋德妻病其友深夜叩公門請決治公往從帷前秉燭望見之即回步不施藥強之診脈亦竟許以死明日更醫無言同者三日以死問之公云白如枯骨死也金陵軍人妻獨居暴怒口鼻頓出血五六升公視之面壁卧不能吐一語氣欲屬不屬奄奄然診之六脈盡脫

取參膏加地黃生犀飲之三日夜止龍塘橋陳家娣如  
有言齊成疾居一年如死娣甚恐力求醫連易數子弗  
瘳皆委去公治之刻以兩月可已從之良已公曰形不  
衰脈有根帶而已周生內年二十八中風不語請治者  
東臂矣公藥之任以亡慮既而然所以然者外無六經  
之形證脈虛遲本情爾也上元人潘病瘵死未死無或  
以死告告死獨公公後告人大骨槁大肉脫是謂形脈  
俱壞羅僉事巾風公診之其脈如弓絃曰入鬼錄遲三



日程邪遲三日遂亡成化元年公省婦翁張御醫豫于  
京師閣老南陽公延張治塾賓南海貢士梁淑一晨間  
張入直李以請公公告李梁病犯厥陰六脈絕不可為  
已言訖趨而出李與數達官共訝之復併命三五醫雷  
然薦湯液暮而死矣周善婦病於娠公斷尺脈不固胎  
雖成其下也母命其偕乎莫不誚笑不三辰如言焉相  
城僧病腫脹喘逆旦夜反覆不能寢一息公為沈公邀  
視視既語云急矣病得之酒遽投辛熱味為救俄而甦

咸以為慶公曰胡慶為病本猶未斷慶在他日耳果三年二發甫除乃以好酒不能禁好厚味不能禁故所以知更發者診其脈伏逆不應也又姻家趙郎年未壯好酒甚酒不離朝夕以酒廢食忽病肌腫浮漫腹彭彭而滿時狂憤可愕家人謂之妖禦以祝由病益劇公觀之趙神方清言無變異也須臾病乃發公曰病得之酒酒以亂神祝何由闕焉嘆之水麾之劍符祝嘈雜重實其實虛其虛也令悉屏去留身對病者徐徐譬解之陳以

正說戒之絕飲重命之要間以湯飲遂安所以知其非  
狂邪脈無怪無絕色無惡也戚女倪氏室而抱病公曰  
疾無傷祇憂天乎衆驚問故公曰質微脈細小是謂形  
脈不應尋而病果已已無何嫁張生嫁無何得娠產亡  
焉太伯鄒節婦八十傷寒不終朝便委頓欲絕公診之  
語其孫炯脈洪而無根然年高氣弱將無虞炯謂市醫  
探利恒態獻白金如干挺公却去與之七劑越日遂瘥  
王侍郎仲兒四十患痰喘晝夜不得休伯氏評事請公

與盛用美氏議治許酬銀於二公公曰藥當出盛君療而酬亦當盛君僕則不能評事問所以然曰脈往來啄焉漏焉候厥逆也評事心竊惡之已乃符其說王家遂謂公口不利絕不復乞醫矣公之不震富貴又然也弘治己酉允明秋試南都館舅氏符臺李公貞伯齋宇曉起緡閱縹帙入夜飲酒數卮就寢自謂和神也積濕熱浹旬漸憤憤不舒八月三日肌大燔灼徹曙自謂困伏故出遨遊數里愈不舒亟返歸中路遇旋風吃吃忍之

還齋不及解衣俯几一大嘔即伏枕頭岑岑如擊碎夜  
誤飲表劑汗如注不解明日添重易以痰劑亦不解又  
明日成痰又易醫易痰劑乃稍定扶歸蘓痰尚未已乞  
救於公延久憊甚公變換救之歷五十日迄痊云允明  
生晚居姻家幼行欽感既久因從叩得治狀一二筆述  
如右所覲傳之為報而猶惜不能以盡公

贊曰公之善也夫心行淑焉道業良焉脩胃華焉公善  
蓋三矣昔韓伯休假於賣藥以存其隱操公既先伯休

行業又然蓋三善兼肖之矣斤斤然君子哉

朱丈人小傳

惟朱令族蔚望中吳善源洪流德風長競故明仲處士  
崇實收華培根待秀高行埃埴雄表郡邦處士既往更  
大發於今公焉公稟負欲碩操施汗漫意量浩濶質幹  
堅凝內覃九族外及八遐吉彼之不能吉凶彼之不能  
凶也發篋無匱老吾老以及人老幼吾幼以及人幼也  
運掌奚難是以尊之於臺閣屏翰卑之於甞黎輿皂

邇之於鄰夫邑子遐之於越季秦昆往往欽仰英聲挹  
清飈而懷卿霑飲受龐惠襲纒續而飶醜齟信拔俗之  
偉夫超時之豪材也雖魏顛之草多結而鄭莊之紀未  
聞小子因撮大該傳示遐永公名繼字宗遠

論曰人之謂公如田文即微之猶鄭當時其揮斥貨寶  
濟輔空急通貫貴達依歸凶極信然抑文為大國公子  
彼將以爭彊當時當時亦位太子舍人交內間宜是公  
當今天下混平位不在九品中外之在位若不在位更

倚以綴屬來往猶羣家尹令其為是豈文當時意哉蓋  
子夏之云四海之內皆兄弟也實其有之而老安少懷  
友信吾夫子志也公固願學者歟

贊曰百嶠望嶽千流澤海九族恩孚百夫力逮庇廈俱  
歡契表或隘風行當世聲貽曠代

懷星堂集卷十六